



Collacios dixebriegos,

Dende Izquierda Asturiana y Moceda d'Izquierda Asturiana facémosvos llegar estes llínies col envís de felicítavos pol vuestru XX Aniversariu que va festexase n'Avilés esta fin de selmana.

Dixebra ye, dende l'entamu, un finxu n'Asturies na defensa y dignificación de la nuesa llingua y un grupu pioneru nel emplegu d'instrumentos tradicionales asturianos nel panorama rock, lo que vos convierte nún grupu imprescindible pa entender la escena musical asturiana y semiente d'una bona montonera de grupos con marca de la casa.

El compromisu social de les vuestres lletres y l'emplegu únicu de la llingua asturiana ye la bas de Dixebra, compromisu que trespasa les llendes de los propios cantares y tradúzse nel contínuu sofitu y militancia colos movimientos sociales y activistes d'estremaos ámbitos, como pue vese na riestra d'actuaciones y collaboraciones solidaries y desinteresáes nestes dos décadas de reivindicación musical.

Asina, podemos topar nel repertoriu de Dixebra cantares sofitando la reivindicación d'oficialidá pa la llingua asturiana -"La danza", "Tolos cartelos", "Tía Nemesia"- reivindicando la defensa del mediu ambiente y la ecoloxía -"Salvái les foques", "Asturalia"-, el compromisu cola llucha obrera, l'internacionalismu y la solidariedá cola emigración -"Indios", "Nun llores", "El vieyu combatiente", "Si vienes"-, y un compromisu total col proyeutu de construcción nacional d'Asturies dende la esquierda "Pallabres vieyes", "Esto ye Asturias", "Da-yos caña"...

Estos valores fueron y siguen siendo les bandes sonores de la nuestra llucha diaria por una Asturias y un Planeta meyores y, como a Xune, entá nos queden munches coses por glayar y por facer... ¡esto nun foi más que l'entamu!

Que Dixebra siga ximiélgando a los mozos y non tan mozos dempués de tou esti tiempu siempre va ser una bona noticia, poro, dende Izquierda Asturiana y Moceda d'Izquierda Asturiana queremos facevos llegar estes lletres como agradecimientu y felicitación por veinte años de llucha polos ideales de la esquierda, del movimientu nacionalista asturianu y de recuperación de la llingua y cultura tradicionales d'Asturies.

¡Salú y dixebra!

Izquierda Asturiana
Moceda d'Izquierda Asturiana
Uviéu, 2 de xunu de 2006